

## Wâjî, Notre-Dame doul Consolacion.

Si les ouayes du Curé Fabin ont ruvnu ou viadje an 1660, après s'awè sâvé dèrant 25 ans et dpus, i n' s' adjichot nin vrêmint des Wajotês.

La parwasse, ki passot coume yène des pus vîyes du l'Eglije du Grêde, su stindot su les alantoûs : Cwarnimont, lu Moncê et l' Fayis. A dèpandint co : Bayamont, Oury, Achy (atère Bayamont et Wâjî) ; onz î wèyot co des boukets d' mères ou XIX<sup>o</sup> siéke.

Si Bayamont et l' Moncê ont sté abandounés dèrant 25 ans, sins k' il î demeure seule djan, et si mwintes Moncêtîs et Bayamounês ont bagué jusk'à dlé Namur et î ont atrapé la pesse, les Wajotês n'ont n'alé fû du viadje k'ènè dîjin.ne d'anéyes. Vikant dins les bwès, atère Wâjî et Sâssère (Carlsbourg), ils on passé à costé doul maladie.

Is n'ont nin manké d' mète ça sul compte doul Vièrje k'ils avint pris avu zès, et k'ils ont priyî sins arèt, pou la faveur k'ile les î è fwêt dèrant si lontins.

Is lî ont dné adon lu vocabe du « Notre Dame de la Consolation », ki mousture bin coubin il les î avot sté d'in grand scours.

Si anute, on l'invoke duzous des ôtes apèlacions, nu duvrot-on ruvnu ou vocabe d'adon ?

Rintrés ou viadje an 1646, is n'ont nin manké du dmander in permis pou lî bâti ène tchapèle. Lu permis è sté acwârdé lu 8 djun 1648. Çu n'ére adon k'ène pôve ravalée an plantches, mès ki moustrot lu vif atatchmint k' is pwârtint à Notre-Dame, duvant minme du rbâti leus lodjmints.

Coume dju l'ans dit pus matin, l'Eglije et la cure du Wâjî ont ratindu des anéyes au long pouz èsse rumètuwes su pîd ; i falot d'abôrd rawè in curé.

Ou saccadje du 1635, lu curé ére Adam Dardenne, docteur an théolojie ki, tins des bisbiyes, è filè adon su Lidje et duvnu vikère du s' frère Hanri Dardenne, pasteur du Fléron.

Wiyême Leloup, ki dvint s' successeur cand les Wajotês ont rgangnî l' viadje, n'è wêre dumèré à Wajî . On lî è dné ène ôte cure ; an 1652, il è passé à l'èglise St Clément à Lîdje. Après, l'è ramplacé in curé dont l'nom mèrite d'èsse rucounu. Les archives ont wårdé les souvnirs du zèle k'il avot, tous coume la radje du rucmîncî la parwasse et d'rapwêji ses ouayes.

Il è oyu co pus d' mèrites cand on sârè k'il est vnu à Wajî à z'abandonnant Frislet, yène des cures les pus importantes du diocèze du Namur.

Nin contant d' çà, pou rècupèrer l' patrimwane du l'èglise, il è agadjî à ses frês, in long procès duvant tous les tribunôs. Après î awè dmèré 17 ans et awè êdî ou rbâtichadje du l'Eglise, il è tnu sa proumesse du rulver Wajî du ses rwines, tandis ku loû dumèrot dins ène masère du brikes et d' plantches, èyu k' il è dmèré des anéyes à long.

---

Çu pådje-ci è ste rprîje d'ène foye scrite à l'machine à scrîre an francès, sins date, ni signature. Dju na sés dpus.

Rumètu an walon pa Louis Baijot. Graide,3/11/2011